

VERKLAGSREGLUR FYRIR LEIKSKÓLA BORGARBYGGÐAR

1. UMSÓKN OG INNTRITUN

- 1.1 Sótt er um leikskóladvöl á vef Borgarbyggðar.
- 1.2 Sækja má um leikskóla frá fæðingardegi barns eða strax og kennitala þess hefur verið skráð. Ef skráðir eru tveir leikskólar á umsókn koma báðir til greina við úthlutun.
- 1.3 Aldur barns ræður því, að öllu jöfnu, hvenær barn fær úthlutað leikskóladvöl.
- 1.4 Leikskólastjóri tilkynnir foreldrum hvenær barnið getur hafið leikskólagöngu, að jafnaði eigi síðar en fjórum vikum áður en leikskóladvöl hefst.
- 1.5 Gert er ráð fyrir því að börn geti hafið leikskólagöngu við 12 mánaða aldur séu laus pláss í leikskólanum. Í undantekningar tilvikum getur leikskólastjóri í samráði við sviðsstjóra fjölskyldusviðs heimilað inngöngu fyrir 9-12 mánaða gömul börn ef það hefur ekki í för með sér viðbótar kostnað fyrir leikskólann og seinkar ekki inntöku eldri barna.
- 1.6 Sé barn að flytja á milli leikskóla innan Borgarbyggð þá þurfa foreldrar að tilkynna báðum leikskólum um fyrirhugaðan flutning. Flutningar verða þegar leikskólastjóri tilkynnir foreldrum á nýja leikskólanum að flutningar geti átt sér stað.
- 1.7 Leikskólar hafa heimild til að setja upp inntökuáætlun um það hvenær aðlaganir fara fram vegna barna á yngstu deild leikskólans. Leikskólar þurfa að leggja áætlunina fram fyrir fræðslunefnd samhliða gerð skóladagatala ár hvert.
- 1.8 Ekki er gert ráð fyrir að taka inn börn í aðlögun eftir 15. apríl hvert ár.

2. SKILYRÐI FYRIR LEIKSKÓLADVÖL

- 2.1 Skilyrði fyrir leikskóladvöl barns er að lögheimili (skv. Þjóðskrá) sé í Borgarbyggð en barnið getur verið á biðlista þótt lögheimili sé annars staðar en plássi er ekki úthlutað fyrir en lögheimilisskráning hefur átt sér stað.
- 2.2 Hægt er að sækja um leikskóladvöl vegna tímabundinna dvala barna með lögheimili í öðrum sveitarfélögum og er þá farið eftir viðmiðunarreglum Borgarbyggðar vegna skóladvalar barna utan lögheimilissveitarfélags.
- 2.3 Börn með lögheimili í Skorradalshrepps geta dvalið í leikskólum Borgarbyggðar samkvæmt þjónustusamningi vegna barna með lögheimili í Skorradalshreppi sem vistuð eru í leikskólum Borgarbyggðar.
- 2.4 Foreldrar barna sem eru tímabundið án kennitölu og lögheimilis eða þau skráð utangarðs í Þjóðskrá geta sótt um leikskólapláss hjá Borgarbyggð. Það er skilyrði að foreldrar og barn séu með fasta búsetu í Borgarbyggð skv. skilgreiningu laga um lögheimili nr. 21/1990 og að gera megi ráð fyrir, að lögheimili þegar það er fengið, verði í Borgarbyggð. Umsókn um undanþágu skal að jafnaði senda á netfangið thjonustuver@borgarbyggd.is. Farið er fram á staðfestingu um búsetu í Borgarbygg með eftirfarandi gögnum: Ríkisborgarar EES og EFTA ríkja og útlendingar sem heimilt er að dvelja á Íslandi án dvalarleyfis skv. lögum um útlendinga nr. 80/2016, þurfa að leggja fram staðfestingu á beiðni um skráningu lögheimilis í Borgarbyggð.

3. LEIKSKÓLAGJÖLD

- 3.1 Leikskólagjöld eru innheimt fyrir fram. Gjald dagi er 1. hvers mánaðar og eindagi 30 dögum síðar.
- 3.2 Leikskólagjöld eru ekki innheimt í júlí
- 3.3 Gjaldskrá leikskóla er endurskoðuð árlega og tekur sveitarstjórn ákvörðun um breytingar á henni. Breytingar á gjaldskrá skulu kynntar foreldrum.
- 3.4 Einstæðir foreldrar greiða lægra gjald eins og fram kemur í gjaldskrá og þarf viðkomandi að vera skráður einstæður í Þjóðskrá. Hefji einstæðir foreldrar sambúð skal greiða hærra gjald þegar sambúð hefst. Slíti foreldrar sambúð skal leggja fram vottorð frá sýslumanni og lækkar þá gjald frá næstu mánaðamótum eftir að vottorð berst.
- 3.5 Námsmenn greiða lægra gjald ef báðir foreldrar eru í fullu námi (30 ECT einingar á önn eða 18 framhaldsskólaeiningar). Sækja skal um námsmannaafslátt til leikskólastjóra. Skila þarf innritunavottorði frá skóla í upphafi hverrar annar.
- 3.6 Foreldrum ber að tilkynna leikskólastjóra um breytingu á högum sínum, s.s. breytt heimilisfang, símanúmer, netfang og hjúskaparstöðu.
- 3.7 Endurnýja þarf umsókn um alla afslætti við upphaf hvers skólaárs í ágúst.

4. DVALARTÍMI

- 4.1 Leikskólar Borgarbyggðar eru opnir frá kl. 8:00 til 16:00 alla virka daga á opnunar tíma leikskóla.
- 4.2 Gjaldfrjálst er í leikskólum á milli kl. 8:00 til 14:00 eða 30 stundir á viku. Foreldrar greiða gjald fyrir hverja klukkustund umfram það samkvæmt gjaldskrá. Fæðisgjald er innheimt alla daga. Ekki er hægt að færa gjaldfrjálsa stund yfir á stund sem kostar í leikskólanum.
- 4.3 Foreldrum stendur til boða að kaupa vistun (náðarkort) frá kl. 7:45-8:00 og/eða kl. 16:00-16:15. Miðað er við að fleiri en 5 börn nýti sér tímann til þess að leikskólinn geti orðið við beiðninni. Tekið er sérstakt gjald fyrir náðarkort
- 4.4 Áður en leikskóladvöl barns hefst gera viðkomandi leikskóli og foreldrar með sér dvalarsamning. Með undirritun sinni staðfesta foreldrar að þeir hafi kynnt sér gjaldskrá Borgarbyggðar og verklagsreglur fyrir leikskóla og skuldbinda sig til að hlíta þeim eins og þær eru á hverjum tíma.
- 4.5 Ef lögheimili barns er meira en 15 km frá leikskóla er heimilt að skrá barnið í 3 daga leikskóladvöl í viku og greiða samkvæmt því.
- 4.6 Ef foreldrar óska eftir flutningi milli leikskóla ber að sækja um það til leikskólastjóra þess leikskóla sem barnið dvelur í og fer þá barnið á biðlista í hinum leikskólanum. Gilda þá sömu reglur um innritun.
- 4.7 Hægt er að sækja um breytingar á dvalartíma, hjá leikskólastjóra fyrir 15. hvers mánaðar. Breytingar miðast við mánaðamót. Áður en breyting er samþykkt þarf leikskólastjóri að taka afstöðu til þess hvort það henti starfseminni. Tekið er sérstakt gjald fyrir breytingar, sjá gjaldskrá.
- 4.8 Barn í leikskóla skal taka að lágmarki fjögurra vikna samfelld sumarleyfi ár hvert. Óski foreldrar eftir því að taka átta til fimm vikna samfelld sumarleyfi eru þær vikur einnig gjaldfrjálsar.
- 4.9 Ef barn er fjarverandi vegna orlofs í samfelld tvær vikur eða lengur umfram sumarleyfi og foreldrar láta vita með hálf mánaðar fyrirvara skal endurgreiða fæðiskostnað fyrir þann tíma sem barnið er í orlofi. Geti barn ekki sótt leikskóla vegna langvarandi veikinda sem

vara í a.m.k. fjórar vikur samfelld geta foreldrar sótt um afslátt af leikskólagjöldum. Sótt skal um til leikskólastjóra.

- 4.10 Borgarbyggð niðurgreiðir aðeins vistun barns í einum leikskóla í senn.
- 4.11 Skráningardagar eru þeir dagar þegar grunnskóli er í vetrar- jóla- og páskafríi ár hvert. Á skráningardögum þurfa foreldrar að skrá börn sín í leikskólann. Þær dagsetningar sem um ræðir liggja fyrir í skóladagatali leikskólans. Noti foreldrar ekki skráningardaga fá þeir niðurfeld gjöld fyrir þá daga. Fleiri en fimm börn þurfa að vera skráð svo það sé opið í leikskólanum.
- 4.12 Falli niður skólastarf s.s. vegna ófærðar, manneklu eða viðbótar skipulagsdags, fleiri en 5 daga á skólaári er gjald felld niður eftir 5. daginn.

5. UPPSÖGN

- 5.1 Gagnkvæmur uppsagnarfrestur á dvalarsamningi er einn mánuður hið minnsta og miðast við 1. eða 15. hvers mánaðar. Uppsögn dvalarsamnings skal vera skrifleg og skilast til leikskólastjóra.
- 5.2 Ef um 3ja mánaða skuld vegna leikskólagjalda er að ræða skoðast það sem uppsögn á leikskóladvöl. Foreldri þarf alltaf að sækja um leikskólapláss að nýju þegar búið er að semja um skuldina við sveitarfélagið.

6. ANNAÐ

- 6.1 Starfsfólk leikskóla Borgarbyggðar er bundið þagnarskyldu. Þagnarskyldan helst þó látið sé af störfum.
- 6.2 Starfsmenn í leikskólum Borgarbyggðar sem eiga börn sem sækja leikskóla í Borgarbyggð fá 50% afslátt af dvalargjöldum, sem gildir upp að 36 stunda vistun. Inn í þeim afslætti eru ekki fæðisgjöld. Séu fleiri en einn afsláttur í gangi þá gildir sá sem gefur hæstan afslátt. Ef starfsfólk á fleiri en eitt barn á leikskóla þá er 100% afsláttur af dvalargjöldum fyrir þau.
- 6.3 Hagsmunir barna skulu ávallt hafðir í fyrirrúmi. Samkvæmt barnaverndarlögum er öllum skylt að tilkynna til barnaverndarþjónustu ef þeir hafa ástæðu til að ætla að barn búi við óviðunandi uppeldisaðstæður, verði fyrir ofbeldi eða annarri vanvirðandi háttsemi eða stofni heilsu sinni og þroska í alvarlega hættu. Tilkynningaskyldan gengur framár ákvæðum laga eða siðareglna um þagnarskyldu starfsstétta.
- 6.4 Leikskólar Borgarbyggðar hafa fimm skipulags- og/eða námskeiðsdaga á hverju skólaári, sem samþykktir eru af fræðslunefnd og skráðir á skóladagatal. Fræðslunefnd getur tekið ákvörðun um að fjölga skipulagsdögum upp í sex s.s. vegna námsferða og sérstakra þróunarverkefna.
- 6.5 Samkvæmt lögum um leikskóla nr 90/2008 eiga börn sem þurfa sérstaka aðstoð og þjálfun rétt á slíkri þjónustu innan leikskólans. Skólaþjónusta Borgarbyggðar veitir ráðgjöf og fræðslu vegna barna ef foreldrar og/eða starfsfólk leikskóla telja þess þurfa til að geta veitt börnunum sem besta menntun, uppeldi, umönnun og umhverfi við hæfi. Stuðlað er að jafnrétti til náms og vellíðan allra barna.
- 6.6 Nánari upplýsingar veitir starfsfólk skólaþjónustu á fjölskyldusviði Borgarbyggðar.. Reglur þessar voru fyrst samþykktar í fræðslunefnd 20.11.2006, endurskoðaðar 1.2.2012, 10. 05 2016, 12.03 2021, 12.06.2023, 2.11.2023, 21.05.2025